

四庫全書

史部

欽定四庫全書

史部

文獻通考卷二百

七十一

詳校官內閣學士

臣瑞保

編修

臣程嘉謨覆勘

覆校官中書

臣孫希旦

校對官中書

臣金光悌

謄錄監生

臣毛師淦

謄錄監生

臣范宜勲

欽定四庫全書

文獻通考卷二百七十

鄱陽馬端臨

貴與著

封建考十一

魏封建諸侯王

任城威王彰建安二十一年封鄆陵侯文帝即位以功
增邑五千并前萬戶黃初二年進爵為公三年立為任
城王四年薨子楷嗣徙封中牟五年改封任城縣太和

六年復改封任城國食五縣二千五百戶青龍三年坐
罪削縣二千戶正始七年徙封濟南二千戶并增邑四
千四百戶

陳思王植建安十六年封平原侯十九年徙封臨菑侯
二十二年增邑至萬戶文帝即位坐罪貶爵安鄉侯三
年立為鄆城王邑二千五百戶四年徙封雍邱六年增
戶五百太和元年徙封浚儀三年徙封東阿六年以陳
四縣封為陳王邑三千五百薨子志嗣徙封濟北王

蕭懷王熊早薨後追封王子哀王炳嗣食邑二千五百戶薨無子國除

豐愍王昂早卒黃初二年追諡曰豐悼公三年以樊安公均子琬嗣嘉平六年襲爵為豐王累增邑至二千七百戶薨子廉嗣

相殤王鑠早薨太和三年追封子潛嗣薨偃邑二千五百戶無子國除

鄧哀王冲早卒以宛侯據子琮奉冲後景初元年坐罪

削邑貶爵為侯正始七年轉封平陽公累增邑并前千九百戶

彭城王據建安十六年封范陽侯二十二年徙封宛侯黃初二年進爵為公三年為章陵王又徙義陽又徙彭城及濟陰景初元年坐罪削爵二千戶三年復景元中累增邑并前四千六百戶

燕王宇建安十六年封都鄉侯二十二年改封魯陽侯黃初二年進爵為公三年為下邳王五年改封單父縣

太和六年封燕王累增邑至五千五百戶薨 奭後入繼大宗即帝位

沛穆王林建安十六年封饒陽侯二十二年徙封譙黃初二年進爵為公三年為譙王五年改封譙縣七年徙鄆城太和六年徙沛累增邑至四千七百戶薨子緯嗣中山恭王衮建安二十一年封平鄉侯二十二年徙東陽侯黃初二年進爵為公三年為北海王又徙贊濮陽及中山青龍元年坐削邑二年復三年卒子孚嗣增邑

至三千四百戶

濟陽懷王玧建安十六年封西鄉侯早卒以沛王林子贊襲爵薨復以贊弟邑紹薨子恒嗣累增邑至千九百戶

陳留恭王峻建安二十一年封鄱侯後徙襄邑黃初三年進爵改封襄邑又改陳留薨子渙嗣累增邑至四千七百戶

范陽閔王矩早卒詔以樊安公均子敏嗣封臨晉侯黃

初五年改封范陽王七年徙句陽增邑至三千四百戶
子焜嗣

趙王幹建安二十年封高平亭侯再徙賴亭弘農黃初
二年封燕王又改河間樂城鉅鹿乃封趙王增邑至五
千戶

楚王彪建安二十一年封壽春侯徙封汝陽弋陽吳壽
春白馬乃改封楚王坐犯禁削縣繼而復所削封至三
千戶嘉平元年令狐愚王凌等謀立彪都許昌凌敗彪

自殺至正元元年封子嘉為常山真定王

郇戴公子整建安二十二年封郇侯薨無子詔以彭城王據子範奉整後子闡嗣增封至千八百戶

樊安公均建安二十二年封薨子抗嗣徙封抗蘇屯留薨子諱嗣累封至千九百戶

東平靈王徹建安二十二年封歷城侯黃初三年為廬江王徙壽張東平坐罪削邑繼復所削薨子翕嗣累封至三千四百戶

樂陵王茂二十二年封萬歲亭侯改封平輿乘氏中邱
聊城乃封王又改曲陽坐罪削繼復徙樂陵增邑至五
千戶

右太祖二十五男其得封傳國者十七人

贊哀王協早薨太和五年追封子尋嗣增戶至三千薨
無子國除

北海悼王蕤黃初七年立為陽平縣王後改封北海薨
以瑯琊王子贊嗣徙封昌鄉饒安文安增邑至三千五

百戶

東武陽懷王璽黃初六年立薨無子國除

東海定王霖黃初三年立為河東王改封館陶東海薨
子啓嗣累增邑至六千二百戶子高貴鄉公髦入繼大

宗嗣帝位

元城哀王禮黃初二年封秦公三年改京兆王又改元
城薨尋以任城王楷子梯嗣改封梁王累增邑至四千
五百戶

邯鄲懷王邕黃初二年封淮南公三年封王又改陳及邯鄲薨以任城王楷子溫嗣改封魯陽累增邑至四千四百戶

清河悼王貢黃初三年封薨無子國除
廣平哀王儼黃初三年封薨無子國除

右文帝子八王

黃初五年詔曰先王建國隨時而制漢祖增秦所置郡至光武以天下損耗并省郡縣以今比之益不及焉其

改封諸王皆為縣王

陳思王傳時法制待藩國既自峻迫寮屬皆賈豎下才兵人給其殘老大數不過二百人又植以前過事復減半十一年中而三徙都常汲汲無歡遂發疾薨正始間宗室曹冏上書曰古之王者必建同姓以明親親必樹異姓以明賢賢親親之道專用則其漸也微弱賢賢之道偏任則其敝也劫奪先聖知其然也故博求親疎而並用之故能保其社稷歷紀長久今

魏尊尊之法雖明親親之道未備或任而不重或釋而不任臣竊惟此寢不安席謹撰合所聞論其成敗曰昔夏商周歷世數十而秦二世而亡何則三代之君與天下共其民故天下同其憂秦王獨制其民故傾危而莫救也秦觀周之敝以為小弱見奪於是廢五等之爵立郡縣之官內無宗子以自毗輔外無諸侯以為藩衛譬猶焚刈股肱獨任胸腹觀者為之寒心而始皇晏然自以為子孫帝王萬世之業也豈不

悖哉故漢祖奮三尺之劍驅烏集之衆五年之中遂成帝業何則伐深根者難為功摧枯朽者易為力理勢然也漢監秦之失封植子弟及諸呂擅權圖危劉氏而天下所以不傾動者徒以諸侯強大磐石膠固故也然高祖封建地過古制故賈誼以為欲天下之治安莫若衆建諸侯而少其力文帝不從至於孝景猥用鼂錯之計削黜諸侯遂有七國之患蓋兆發高帝釁鍾文景由寬之過制急之不漸故也所謂末大

必折尾大難掉尾同於體猶或不從況乎非體之尾
其可掉乎武帝從主父策下推恩之令自是之後遂
以陵夷子孫微弱衣食租稅不預政事至於哀平王
氏秉權假周公之事而為田常之亂宗室王侯或乃
為之符命頌莽恩德豈不哀哉由斯言之非宗子獨
忠孝於惠文之間而叛逆於哀平之際也徒以權輕
勢弱不能有定耳賴光武皇帝挺不世之姿擒王莽
於已成紹漢嗣於既絕斯豈非宗子之力也而曾不

監秦之失策襲周之舊制至於桓靈閭官用事君孤
立於上臣弄權於下由是天下鼎沸姦宄並爭宗廟
焚為灰燼宮室變為榛藪太祖皇帝龍飛鳳翔掃除
凶逆大魏之興於今二十有四年矣觀五代之存亡
而不用其長策觀前車之傾覆而不改於轍迹子弟
王空虛之地君有不使之民宗室竄於閭閻不聞邦
國之政權均匹夫勢齊凡庶內無深根不拔之固外
無磐石宗盟之助非所以安社稷為萬世之業也且

今之州牧郡守古之方伯諸侯皆跨有千里之土兼
軍武之任或比國數人或兄弟並據而宗室子弟曾
無一人間廁其間與相維制非所以強幹弱枝備萬
一之虞也今之用賢或超為名都之主或為偏師之
帥而宗室有文者必限小縣之宰有武者必致百人
之上非所以勸進賢能褒異宗室之禮也語曰百足
之蟲至死不僵以其扶之者衆也此言雖小可以譬
大是以聖王安不忘危存不忘亡故天下有變而無

傾危之患矣。固冀以此論感悟曹爽，爽不能用。

陳壽評曰：魏氏王公既徒有土國之名而無社稷之實，又禁防壅隔，同於圜圉，位號靡定，大小歲易，骨肉之恩乖，棠棣之義廢，為法之弊一至於此乎？袁子曰：魏興承大亂之後，民人損減，不可則以古始。於是封建侯王，皆使寄地空名而無其實。王國使有老兵百餘人以衛其國，雖有王侯之號而乃儕於匹夫。縣隔千里之外，無朝聘之儀，鄰國無會。

同之制諸侯游獵不得過三十里又為設防輔監國之官以伺察之王侯皆思為布衣而不能得既違宗國藩屏之義又虧親戚骨肉之恩

魏列侯

魏黃初三年初制封王之庶子為鄉公嗣王庶子為鄉侯公之庶子為亭伯其後定制凡國王公侯伯子男六等次縣侯次鄉侯次亭侯次關內侯又置名號侯爵十八級關中侯爵十七級皆金印紫綬關外侯十六級銅

印龜紐墨綬五大夫十五級銅印環紐亦墨綬自關內侯皆不食租虛封爵自魏始而有保傅相常侍侍郎郎中令中尉大農文學友謁者大夫諸雜署令丞公主有家令僕丞行夜督郵王太妃有家令僕丞

公孫康遼東襄平人漢末父度據遼東至康以斬袁尚功封襄平侯子淵嗣明帝時拜大司馬封樂浪公景初元年遣使徵之淵發兵反遣司馬懿討誅之

張燕常山真定人本羣盜聚衆河北太祖將平冀州遣

使求佐王師拜平北將軍封安國亭侯邑五百戶薨子

方嗣融

張繡武威祖厲人漢末聚衆於祖厲後領衆屯宛與劉表合太祖南征以衆降封宣威侯以軍功增邑至二千戶薨子泉嗣坐反誅國除

張魯沛國豐人據漢中太祖討平之出降封閭中侯邑萬戶封魯五子及閭圃等皆為列侯子富嗣

夏侯惇沛國譙人以從征呂布功封高安鄉侯增邑至

二千五百戶薨諡忠侯子充嗣 廩劬

河內人韓浩 沛國人史渙俱以忠勇顯掌禁兵封

侯附惇傳

夏侯淵惇族弟以軍功封博昌亭侯後守漢中為劉先
主所襲戰死諡愍侯子衡嗣 績 褒

曹仁太祖從弟以征伐功進封陳侯增邑至三千五百
戶薨諡忠侯子泰嗣轉封寧陵侯 初泰弟楷範皆為

列侯

仁弟純以征伐功封高陵亭侯邑三百戶卒謚威侯
子演嗣

曹洪太祖從弟以征伐功封野王侯二千一百戶薨謚
恭侯子馥嗣 太祖分洪戶封子震為列侯 族父瑜
官至衛將軍封侯

曹休太祖族子以征伐功封長平侯增邑至二千五百
戶薨謚壯侯子肇嗣 興 文帝分休戶三百封肇弟
纂為列侯

曹真太祖族弟以軍功封東鄉侯累增戶至二千九百
薨謚元侯子爽嗣明帝崩受遺輔少主加侍中武安侯
邑萬二千戶坐擅權為司馬懿所誅夷 明帝思真功
封其五子義訓則彥皚皆為列侯 文帝分真邑二百
戶封弟彬為列侯

夏侯尚淵從子以軍功封昌陵鄉侯薨謚悼侯子元嗣
坐謀誅司馬師為師所誅夷

荀彧潁川潁陰人太祖平袁紹以彧前後籌策功封萬

歲亭侯累增邑至二千戶薨諡敬侯子惲嗣 彪 頤
荀攸或從子與或同時以籌策功封陵樹亭侯增邑至
七百戶子適嗣 彪

賈詡武威姑臧人以說張繡降太祖功封都亭侯進封
魏壽鄉侯增邑至八百戶薨諡肅侯子穆嗣 模

田疇右北平無終人太祖征烏丸疇將衆為向導破虜
以功封亭侯邑五百戶固辭不受

何夔陳郡陽夏人太祖時參軍事文帝為太子以夔為

少傅帝即位封成陽亭侯邑三百戶薨諡靖侯子曾嗣
鍾繇潁川長社人太祖時馬騰韓遂擁強兵擅關中乃
以繇為侍中持節督關中魏國初建為相國文帝受禪
進封崇高鄉侯增邑至千八百戶薨諡成侯子毓嗣

文帝分毓戶邑封繇弟演及子劬孫豫列侯 駿

華歆平原高唐人魏國建為御史大夫文帝即位拜相
國封安樂侯明帝即位封博平侯增邑至千三百戶薨
諡敬侯子表嗣 文帝時分歆戶邑封歆弟緝列侯

王朗東海人魏國建以軍祭酒領魏郡太守文帝即位
為司空封樂平鄉侯明帝即位封蘭陵侯增邑至十二
百戶薨諡成侯子肅嗣 文帝分朗邑封朗兄子詳為
列侯

程昱東郡東阿人以從討破袁譚尚功封安國亭侯文
帝即位封安鄉侯增邑至八百戶薨諡肅侯子武嗣
克良

郭嘉潁川陽翟人從征伐以籌策功封洧陽亭侯增邑

至千戶薨諡貞侯子率嗣 深 獵

董昭濟陰定陶人說太祖移駕都許以謀策功封千秋亭侯後進爵樂平侯邑千戶薨諡定侯子冑嗣

劉暔淮南成惠人太祖文帝時為侍中征討預謀畫明帝時以功封東亭侯邑三百戶薨諡景侯子寓嗣

蔣濟楚國平阿人太祖時為丞相主簿文明時仕至散騎常侍預軍國謀議齊王即位進爵昌陵亭侯薨諡景侯子秀嗣 凱

劉放涿郡人魏國建為祕書郎文明時為中書監掌機
密封西鄉侯齊王即位以定策增邑至一千一百戶薨
諡敬侯子正嗣

孫資太原人自太祖以來與劉放俱任中書掌機密封
陽亭侯齊王即位以定策增邑至千戶薨諡貞侯子宏
嗣

劉靖沛國相人太祖時表靖父馥為揚州刺史恩惠大
行戰守有備馥卒子靖為河南尹有父風封廣陵亭侯

邑三百戶諡景侯子熙嗣

司馬朗河內溫人太祖時為丞相主簿從征伐明帝即位錄其功封朗子昌武亭侯邑百戶子洪嗣

梁習陳郡柘人文帝時為并州刺史政治為天下最封申門亭侯邑百戶薨子施嗣

張既馮翊高陵人文帝時為涼州刺史以擊胡功封西鄉侯增邑至四百戶薨諡肅侯子緝嗣坐與李豐同謀誅司馬師見殺

賈逵河東襄陵人太祖時為丞相主簿從征伐文帝受
禪以功封陽里亭侯四百戶薨諡肅侯子充嗣

任峻河南中牟人太祖征伐峻常居守置屯田給軍糧
以功封都亭侯邑三百戶薨諡成侯子先嗣

蘇則扶風武功人文帝時為護羌校尉以征羌功封都
亭侯邑三百戶薨諡剛侯子怡嗣

愉

怡弟
襲封

杜畿京兆杜陵人為河東太守十六年治為天下最文
帝踐祚封豐樂亭侯邑百戶諡戴侯子恕嗣

張遼鴈門馬邑人太祖時為將破袁譚攻孫權有功文帝即位封晉陽侯邑增至二千六百戶諡剛侯子虎嗣統

樂進陽平衛國人太祖時為軍司馬以征伐功封廣昌亭侯增邑至千二百戶諡威侯子緄嗣肇

于禁泰山鉅平人太祖時以征伐功封益壽亭侯增邑至千二百戶後禦關羽於樊軍敗降羽文帝時自吳還卒諡厲侯子圭嗣

張郃河間人太祖時以征伐功封鄭侯後增邑至四千三百戶卒諡壯侯子雄嗣 明帝以郃功分其邑封郃四子列侯

徐晃河東楊人太祖時征伐有功文帝即位封陽平侯增邑至三千一百戶諡壯侯子蓋嗣 霸 明帝分晃子孫二人列侯

李典山陽鉅野人太祖時從軍以功封都亭侯邑三百戶薨諡愍侯子禎嗣

李通江夏平春人以軍功封都亭侯增邑至四百戶諡
剛侯子晷嗣

臧霸泰山華人太祖攻袁紹時霸為瑯琊相以精兵入
青州封都亭侯文帝即位封良成侯增邑至三千五百
戶諡威侯子艾嗣 明帝以霸前後功封子三人列侯
文聘南陽宛人為劉表大將太祖征荊州劉琮降聘詣
太祖後以禦關羽孫權功封新野侯增邑至千九百戶
諡壯侯子休嗣 武

呂虔任城人太祖時為泰山太守以平寇功封益壽亭侯增邑至六百戶子翻嗣桂

許褚譙國譙人太祖時從征伐有功文帝立封萬歲亭侯增邑至七百戶諡壯侯子儀嗣綜

龐德南安狁道人初從張魯太祖定漢中乃降封關門亭侯與曹仁共攻關羽不克死之諡壯侯封其二子皆為列侯

衛覬河東安邑人太祖時以治書侍御史鎮關中招懷

有功文帝立封陽吉亭侯增邑至三百戶諡敬侯子瓘嗣

傅嘏北地泥陽人黃初中為侍中尚書高貴鄉公時進封武鄉亭侯以勸司馬師討母邱儉功增邑至千二百戶諡元侯子祗嗣

陳羣潁川許昌人太祖時辟為西曹掾文帝在東宮待以交友之禮即位封昌武亭侯帝寢疾與曹真司馬懿等並受遺詔輔明帝封潁陰侯增邑至千三百戶諡靖

侯子泰嗣

恂

溫

恂弟
紹封

陳矯廣陵東陽人太祖時為司空掾文帝即位以佐命
功封東鄉侯邑六百戶謚貞侯子本嗣 粲

徐宣廣陵海西人太祖時為司空掾明帝即位為尚書
封津陽亭侯邑二百戶謚貞侯子欽嗣

衛臻陳留襄邑人太祖時參丞相軍事文帝踐祚封安
國亭侯正始中進爵長垣侯邑千戶謚敬侯子烈嗣

盧毓涿郡涿人太祖時為丞相法曹齊王即位為僕射

封高樂亭侯後封容城侯二千三百戶謚成侯孫藩嗣
和洽汝南西平人初從劉表太祖定荊州辟為丞相掾
明帝即位封西陵鄉侯邑二百戶薨謚簡侯子禽嗣

常林河內溫人文帝為五官將時林為功曹帝即位封

樂陽亭侯薨謚貞侯子岿嗣

靜皆弟
紹封

杜襲潁川定陵人太祖時為丞相軍祭酒文帝即位封
武平亭侯累封至五百五十戶謚定侯子會嗣

趙儼潁川陽翟人太祖時為司空掾屬主簿明帝即位

進封都鄉侯邑六百戶薨謚穆侯子亭嗣

裴潛河東聞喜人太祖時為丞相理曹掾明帝即位封清陽亭侯邑二百戶薨謚貞侯子秀嗣

韓暨南陽堵陽人太祖平荊州辟為丞相士曹掾文帝即位封宜城亭侯邑二百戶薨謚恭侯子肇嗣 邦

崔林清河東武城人太祖時為丞相掾明帝時為司空

封安陽亭侯邑六百戶魏三公封列侯自林始薨謚孝侯子述嗣

高柔陳留圉人太祖辟為丞相倉曹屬明帝即位封延

壽亭侯齊王時以預誅曹爽功封安國侯為太尉增邑至四千戶薨諡元侯孫渾嗣

孫禮涿郡容城人文帝時為尚書齊王時遷司空封大利亭侯邑一百戶薨諡景侯孫元嗣

王觀東郡廩丘人太祖時為文學掾歷仕文明二帝高貴鄉公即位既誅曹爽封觀陽鄉侯後增邑至二千五百戶遷司空薨諡肅侯子惲嗣

辛毗潁川陽翟人初從袁紹太祖克鄴表毗為議郎文

帝時封廣平亭侯薨諡肅侯子敞嗣

滿寵山陽昌邑人太祖時為汝南太守以戰功封安昌亭侯明帝即位封昌邑侯增邑至九千六百戶薨諡景侯子偉嗣

田豫漁陽雍奴人太祖時為丞相軍謀掾文帝初為護烏丸校尉以討胡功封長樂亭侯增邑至五百戶薨子彭祖嗣

郭淮太原陽曲人文帝時為鎮西長史討平關中叛胡

封射陽亭侯後進封陽曲侯邑凡二千七百八十戶分
三百戶封一子亭侯薨諡貞侯子統嗣 正

徐邈燕國薊人太祖時為丞相軍謀掾文帝立以討叛
羌功封都亭侯邑三百薨諡穆侯子武嗣

胡質楚國壽春人太祖時為丞相屬文帝即位為征東
將軍都督青徐諸軍事積穀備邊薨追封陽陵亭侯邑
百戶諡貞侯子威嗣

王景太原晉陽人文帝時為兗州刺史後以戰功封京

陵侯討母邱儉文欽諸葛誕等破之增邑至四千七百戶
戶薨諡穆侯子渾嗣

王基東萊曲城人文帝時為中書侍郎高貴鄉公即位
封常樂亭侯後以預計文欽等功增邑至五千七百戶
薨諡景侯子徽嗣

王凌太原祁人太祖時為丞相掾文帝即位為兗州刺
史後以戰功封南鄉侯邑千三百五十戶司馬懿秉政
凌謀立楚王彪事覺懿討之自殺

母邱儉河東聞喜人父興黃初中為武威太守以討叛胡功封高陽鄉侯儉襲父爵後以討公孫淵功進封安邑侯邑三千九百戶司馬師專政儉矯太后詔起兵討之兵敗死

諸葛誕瑯琊陽都人明帝時為御史中丞後以討吳功封高平侯邑三千五百戶為征東將軍司馬昭秉政誕舉兵降吳昭討之兵敗死

鄧艾義陽棘陽人為司馬懿掾屬後以破文欽等功封

方城鄉侯拒姜維破之遷征西將軍增邑至六千六百戶以平蜀功為太尉增邑二萬戶封二子亭侯邑各千戶鍾會譖而殺之

鍾會潁川長社人太傅繇小子高貴鄉公即位以謀討母邱儉等功封東武亭侯邑三百戶後以平蜀功為司徒進封縣侯增邑萬戶封子二人亭侯邑各千戶坐反誅

右魏世諸侯王及列侯之見於史傳而可考者

按漢人嘗稱萬戶侯蓋列侯大者多食萬戶魏則雖親王所食未有及萬戶者漢光武封功臣如鄧寇輩皆以元功食四縣范曄猶以為懲韓彭之戮存矯枉之志故不大其封土使之得以功名自終魏則諸王所食不過一縣蓋封建之制至曹魏而規模益貶矣然以天下戶口之數考之西漢盛時至一千餘萬而魏氏不過六十六萬有奇蓋郡國所上戶口猶不及漢十之一則宜其分封之戶數

不能如漢制也又兩漢戶賦輕而魏晉以來戶賦
重受封者皆食其戶賦則輕者不容不多而重者
不容不少矣張繡傳言時天下戶口減耗十裁一
存諸將封未有滿千戶者而繡獨以功封二千戶
亦一證也

文獻通考卷二百七十

欽定四庫全書

文獻通考卷二百七十一

鄱陽馬端臨貴與著

封建考十二

晉諸侯王列侯

晉亦有王公侯伯子男六等之封

晉令曰有開國郡公縣公郡侯縣侯伯子

男及鄉亭關中關內外等侯之爵

唯安平郡公孚邑萬戶制度如魏諸

王其餘縣公邑千八百戶地方七十五里大國侯邑千

六百戶地方七十里次國侯邑千四百戶地方六十五里大國伯邑千二百戶地方六十里次國伯邑千戶地方五十里大國子邑八百戶地方五十里次國子邑六百戶地方四十里男邑四百戶地方四十里武帝受禪之初泰始元年封建子弟爲王二十餘人以郡爲國邑二萬戶爲大國置上中下三軍兵五千人邑萬戶次國置上軍下軍兵三千人邑五千戶爲小國置一軍兵千五百人王不之國官於京師罷五等之制公侯邑萬戶

以上爲大國五千以上爲次國不滿五千戶爲小國初

雖有封國而王公皆在京都咸寧三年詔徙諸王公皆

歸國

時楊玘荀勗以齊王攸有時名懼惠帝有後難乃追故司空裴秀立封建之旨遂詔王公悉令歸國

更制戶邑皆中尉領兵其平原汝南琅瑯扶風齊爲大

國梁趙樂安燕安平義陽爲次國其餘爲小國皆制所

近縣益滿萬戶又爲郡公制度如小國王亦中尉領兵

郡侯如不滿五千戶王置一軍千一百人亦中尉領之

於時唯特增魯國公戶邑追進封故司空博陵公王沈

爲郡公鉅平侯羊祜爲南城郡侯又南宮王承隨王萬
各於泰始中封爲縣王邑千戶至是改正縣王增邑爲
三千戶制度如郡侯亦置一軍自此非皇子不得爲王
而諸王之支庶皆皇家之近屬至親亦各以土推恩受
其大國次國始封王之支子爲公承封王之支子爲侯
繼承封王之支子爲伯小國五千戶始封王之支子及
始封公侯之支子皆爲男非此皆不得封其公之制度
如五千戶國侯之制度如不滿五千戶國亦置一軍千

人中尉領之伯子男以下各有差而不置軍大國始封之孫罷下軍曾孫又罷上軍次國始封之孫亦罷下軍其餘付以一軍爲常大國中軍二千人上下軍各千五百人次國上軍二千人下軍千人其未之國大國置守士百人次國八十人小國六十人郡侯縣公亦如小國制度既行所增徙各如本秦

既遣就國而諸公皆戀京師涕泣而去及吳平後齊

王攸遂之國

凡名山大澤不以封鹽鐵金銀銅錫始平之竹

園別都宮室園囿皆不爲屬國其仕在天朝者與之國

同皆自選其文武官

時齊王攸國相上長史缺典書令請求差選攸下令曰官人叙才皆

朝廷之事非國所宜裁也其令自上請之又當時王諸家人衣食皆出御府攸乃表租秩足自供遂求絕之

入作卿士而其世子年已壯者皆遣蒞國其王公侯以

下茅社符璽車旗命服一如秦始故事凡王金印龜紐

纁朱綬遠遊三梁冠絳紗朝服佩山元玉

開國郡公縣公金章阜朱

綬綬郡侯青朱綬同進賢三梁冠絳朝服佩山元玉開國縣侯伯子男金章朱墨綬冠玉亦同初武帝

踐祚封宣帝孫永爲東莞郡王始置二卿侯以下置官

屬隨國大小無定制諸侯並三分食一東晉元帝太

興元年始置九分食一

元帝以西陽王義屬尊元會特為設牀明帝以義皇室元老特

為之拜成帝詔義依安平獻王孚故事設牀帳於殿上帝親迎拜

王國有傳

傳即師也

帝諱故曰傅武帝初置亦謂之師山公啓事曰王為燕王師

友

武帝初置一人蓋因文王仲尼四友之名

典書令丞

掌國教令職官錄曰漢制本曰尚書改為文治書國諱又改為典書至晉武置典書令

學一郎中令中尉大農

為三卿

左右常侍

大國各二人次國各一人掌贊

相獻

內史

改太守為內史又晉書曰改國相為內史

將軍

大國上中下軍三將軍次國上下二

軍將軍各一人小國上軍而已

典祠典衛學官令治書中尉司馬世子

庶子陵廟牧長謁者中大夫舍人典府等其後省相及

僕省郎中置侍郎二人

初晉武帝輔魏政阮籍常言於帝曰平生曾游東平樂其風土

即拜爲東平相籍乘驢到郡壞府舍屏障使內外相通法令清簡旬日而還

公侯以下國官

屬遞減

晉書曰詔以壽光公鄭冲及朗陵公何曾國皆置郎中今又曰元帝初渡江即晉王位諸參軍

奉車都尉掾屬者百餘人時人謂之百六掾

晉諸侯王

安平獻王孚宣帝次弟泰始元年封邑四萬戶拜太宰
八年薨孫穆王隆嗣無子國除

義陽城王望孚子初出繼伯父朗武帝受禪封邑萬戶

泰始七年薨孫奇嗣後徙封棘陽王

河間平王洪望子出繼叔父昌武帝受禪封咸寧二年

薨子混嗣 滔 休

隨穆王整望子武帝以義陽國一縣封整爲隨縣王薨

子邁嗣

竟陵王楸望子武帝受禪封東平王邑三千九十七戶

懷帝踐祚改封竟陵王後爲亂兵所害

太原成王輔孚子武帝受禪封渤海王邑五千三百七

十九戶後徙爲太原王薨子弘嗣後徙封中丘 鑠

下邳獻王晃字子武帝受禪封邑五千一百七十六戶

薨子韓嗣 韶

太原烈王瓌字子武帝受禪封邑五千四百九十六戶

薨子顥立徙封河間王趙王倫篡位齊王罔謀討之遣

使告顥顥初不從遣張方助倫後見罔等兵盛乃從之

倫既誅顥復興兵討罔殺之復與成都王穎謀舉兵誅

長沙王乂遣張方入京城大掠以穎爲太弟奉乘輿都

長安後爲南陽王模所殺并其三子 融彭城王植子

詔以爲顯嗣改封樂成縣王 欽

高陽元王珪孚子武帝受禪封邑五千五百七十戶薨

子哀王緝嗣 訟

常山孝王衡孚子武帝受禪封邑三千七百九十戶薨

子敦嗣

沛順王景孚子武帝受禪封邑三千四百戶薨子韜嗣

彭城穆王權宣帝弟武帝受禪封邑二千九百戶薨子

元王植嗣 康王釋 雄 紘 元 宏之 邵之

崇之

緝之

宋受禪
國除

高密文獻王泰宣帝弟武帝受禪封隴西王邑三千二

百戶後改封高密王邑萬戶薨子孝王畧嗣 恭王俊

敬王純之

恢之

宋受禪
國除

東海孝獻王越泰次子以討楊駿功封五千戶侯後封

東海王食六縣長沙王乂既敗帝西幸以越爲太傅與

河間王顥共輔朝政越引兵奉帝還洛陽遂專朝政帝

崩懷帝立委政於越所在寇亂上下崩離越以憂薨

冲元帝子以嗣越率徙封瑯琊王後嗣帝位桓溫廢之彦璋爲桓元所殺國除

南陽王模泰子初封平昌公永嘉初進爵南陽王轉征西大將軍代河間王顥鎮關中劉聰攻長安模敗降爲聰所害子保嗣

新蔡武哀王騰泰子初封東瀛公永嘉初封新蔡王遷車騎將軍鎮鄴羣盜李豐等攻鄴騰不能守爲豐所害

子莊王確嗣

爲石勒所殺

弼

邈

晃

崇

惠

宋受禪國除

范陽康王綏宣帝弟武帝受禪封薨子虢嗣

黎

濟南惠王遂宣帝弟武帝受禪封薨子眈嗣

譙剛王遜宣帝弟武帝受禪封邑四千四戶薨子定王

隨

邃

沒於石勒

閔王承隨弟元帝以紹遜封爲湘州刺史王敦構逆

圍承兵敗死之烈王無忌忠王尚之

爲桓元所殺

文

思

坐謀逆死國除

高陽王睦宣帝弟武帝受禪封中山王邑五千二百戶

後徙封高陽王薨孫毅嗣

沒於石勒

文深

法連

宋受禪國除

任城景王陵宣帝弟武帝受禪封北海王邑四千七百

戶後改封任城薨子濟立

爲石勒所害

西河繆王斌陵子武帝受禪封陳王邑千七百一十戶

後改封西河薨子隱嗣

香

平原王幹宣帝子武帝受禪封邑萬一千三百戶薨

會劉

聰亂不遑贈
典世子早卒

瑯琊武王卬宣帝子武帝受禪封東莞郡王邑萬六百戶後徙瑯琊薨子恭王覲立 睿渡江是爲元帝 哀以皇子奉恭王祀早薨 昱徙封會稽後爲簡文帝 德文是爲恭帝既立瑯琊國除

武陵莊王澹卬子卬薨分國封之後爲石勒所害子哀王喆嗣

晞元帝子繼喆後璿 遵

東安王繇卬子卬薨封後爲成都王穎所殺渾無子國除

淮陵王瓘卬子以預討趙王倫功封薨子貞王融嗣

蘊

安之

宋受禪
國除

燕王機父清惠亭侯宣帝子早卒武帝受禪封機爲燕

王邑六千六百六十三戶後增戶至二萬薨子幾嗣

扶風武王駿宣帝子武帝踐阼進封汝陰王邑萬戶後

徙封扶風薨子暢嗣改封順陽王

劉聰入洛
不知所終

新野莊王歆駿子駿薨推恩分國封歆縣公後以預計

趙王倫功封王邑二萬戶

後爲賊張
昌所害

劭

沒於
石勒

梁孝王彤宣帝子武帝踐阼封邑五千三百五十八戶

後與趙王倫共廢賈后爲太宰增封二萬戶薨禧沒於

石勒翹 璿 穌 珍之爲劉裕所害國除

齊獻王攸文帝子以景帝無子命爲嗣武帝受禪封齊王薨子冏嗣趙王倫篡位冏起兵誅倫惠帝反正拜大司馬河間王顥長沙王又舉兵殺之子超嗣 柔之

建之宋受禪國除

東萊王蕤攸子出繼遼東王定國後徙封東萊齊王冏

既秉政蕤密謀廢冏坐廢死定國文帝子

廣漢冲王贊攸子繼廣漢殤王薨

殤王文
帝子

實

以弟繼改
封北海王

城陽哀王肇文帝子早死武帝踐阼追封

景度 憲

祗 遐

樂安平王鑒文帝子武帝踐阼封尋薨

籍 冰

樂平王延祚文帝子以篤疾不任封太康初封尋薨無
子

汝南文成王亮宣帝第四子武帝踐阼封扶風王邑萬
戶惠帝即位楊駿誅爲太宰錄尚書事後爲賈后及楚

王瑋所殺

矩與亮同遇害

祐義

遵之

蓮扶

宋受禪國

除

西陽王羨亮子惠帝時封元帝渡江即位拜侍中太保
明帝崩受遺輔成帝後坐降蘓峻賜死國除

南頓王宗亮子以討劉喬功封萬戶後渡江爲左將軍
坐反死

汝陽王熙亮子以討劉喬功封永嘉末沒於石勒

楚隱王瑋武帝第五子初封始平王後徙楚楊駿誅賈

后令瑋誅汝南王亮及衛瓘復以矯詔罪瑋而殺之

範

爲石勒所害

趙王倫宣帝第九子武帝即位封瑯琊郡王後徙趙惠帝時爲車騎將軍諂事賈后及后廢殺皇太子倫以兵廢后篡位齊王冏等討而誅之

長沙厲王乂武帝第六子太康十五年封趙王倫篡位乂與齊王冏等舉兵誅倫復攻冏而殺之河間王顥等以兵攻乂東海王越收乂送金墉城張方取而殺之子

碩嗣

沒於
劉聰

成都王穎武帝第十六子太康末受封趙王倫篡位穎
與齊王冏等以兵討誅之及冏敗穎鎮鄴遙執朝政憚
長沙王乂與河間王顥等以兵犯京師執乂殺之廢太
子覃以穎爲太弟穎僭侈無君陳旻等奉帝討之敗績
後爲烏丸羯末等所襲奉帝奔長安河間王顥廢穎以
豫章王爲皇太弟范陽王虓幽穎而殺之
遵
沒於
石勒
秦獻王東武帝子泰始初封汝陽王後徙封秦邑八萬

戶於時諸王封中土者皆五萬戶以東爲太子同產特加之元康元年薨郁鄴以吳王晏子嗣後入紹帝位爲愍帝國絕

毘陵悼王軌武帝子二歲夭太康時追封以楚王瑋子義嗣

城陽懷王景武帝子出繼叔父城陽哀王兆後早薨無子

東海冲王祗武帝子受封早薨

始平哀王裕武帝子受封早薨

迪

以淮南王
允子嗣

淮南忠壯王允武帝子初封濮陽王後更封趙王倫既廢賈后以允爲太尉倫將篡允帥兵攻之爲倫所害

祥

代哀王演武帝子太康十年封薨子廓嗣

新都王該武帝子咸寧三年封薨無子國除

清河康王遐武帝子出繼叔父城陽哀王兆永康中薨子單後立爲皇太子河間王顥等舉兵脅遷復廢爲清

河王未幾被害 籥

汝陰哀王謨武帝子早薨無後

吳敬王晏武帝子太康十年封洛京陷遇害

渤海殤王恢武帝子早薨無後

武帝太康時劉頌上疏曰三代並建明德以藩帝室
延祚久遠近者五六百歲遠者千載秦氏罷侯置守
二世而亡漢承周秦之後雜而用之前後二代各二
百餘年揆其封建強弱不適不盡事中然跡其衰亡

常在同姓失職諸侯微時不在強盛昔呂氏之亂賴齊代以寧社稷七國叛逆梁王扞之以彌其難自是之後威權日削王莽得以遂其奸謀傾蕩天下光武紹起雖封樹子弟而不建成國之制祚亦不延魏氏乘之圈閉親戚幽囚子弟是以神器速傾天命移在陛下又魏氏時三方未賓實有戰國相持之勢大晉之興宣帝定燕太祖平蜀陛下滅吳可謂功格天地宜因盛明之時開啓土宇使同姓必王建久安於萬

載垂長世於無窮今諸侯裂土皆兼於古之諸侯而君賤其爵臣恥其位莫有安志其故何也法同郡縣無成國之制故也今之建置宜一如古典

惠帝永興初劉宏上言曰自頃兵戈紛亂猜禍蜂生疑隙構於羣王災難延於宗子今夕爲忠明旦爲逆翩其反而互爲戎首載籍以來骨肉之禍未有如今者臣切悲之今邊陲無備豫之儲中華有杼軸之困而股肱之臣不惟國體職競尋常自相楚剝萬一四

夷乘虛爲變此亦猛虎交鬪自效於卞莊者矣臣以爲宜速發明詔詔顯越等令兩釋猜嫌各保分局自今以後其有不被詔書擅興兵馬者天下共代之

按魏疎忌骨肉故武之子文之母弟不過食一縣且刻削遷徙殊無寧日幾不能以自存晉矯其敝受禪之初不特宣文之子孫畢王雖宣帝諸弟如孚如泰輩之子孫亦且同時俱封又許其自選官屬而王家人衣食御府別給之親親之意亦厚矣

劉頌所言無成國之勢蓋以其徒享封土而不治
吏民有同郡縣此乃漢景武以後之法制然惠帝
既立之後諸王或鎮雄藩或專國政廢賈誅趙猶
運之掌則亦不可以言無事任矣而干戈相侵自
相屠毒遂以覆國蓋晉之創業不以道而垂統非
其人故天命不祐雖有磐石之宗適以基禍固難
以周漢自詭也

臨川獻王郁簡文帝子早卒簡文即位追封 寧康

會稽文孝王道子簡文帝少子出繼瑯琊王後更封會稽孝武即位進錄尚書事安帝即位進太傅假黃鉞後以討桓元不克爲元所害子脩之

右晉宗室王姓名之見於史傳者

張軌安定烏氏人永寧初爲護羌校尉涼州刺史以破鮮卑功封安樂鄉侯進封西平郡公立十三年薨諡武公子寔嗣立進位大都督涼州牧侍中司空承制行事

六年爲閭沙等所殺諡昭公弟茂嗣五年薨諡成公兄
子駿嗣時羣寮勸駿稱涼王駿不許然自後境內皆稱
之爲王立二十二年薨諡文公子重華嗣始自稱持節
大都督太尉護羌校尉涼州牧河西公假涼王立十一
年薨諡昭公子曜靈嗣爲伯父長寧侯祚所弑諡哀公
祚篡位改元爲和平元年三年爲張瓘等所殺元
靚耀靈庶弟嗣廢和平之號復稱晉正朔立九年薨爲
天錫所弑諡冲公天錫駿少子嗣立十三年秦王堅

遣將苟萇伐之天錫兵敗降秦 自軌爲涼州至天錫
凡九世七十六年

李暟隴西成紀人呂光末燉煌人推暟爲太守六郡推
暟爲大都督大將軍涼公領秦涼二州牧義熙元年暟
改元建初遣使奉表詣建康立三年薨國人謚爲武昭
王子士業嗣改元爲嘉興爲沮渠蒙遜所敗死國亡
暟以晉安帝隆安四年立至末少帝景平元年滅凡再
世二十四年

右晉祚中微羣雄割據以一隅之地盜名字者不一惟二涼累世不失藩臣禮故晉書述於列傳明其異於載記所書僭偽之羣胡也故今叙其世系於宗室王之後爲異姓王云

晉五等侯

王祥瑯琊臨沂人魏末以從討毋邱儉功封亭侯後拜司空爲睢陵侯晉武即位進爵爲公薨諡元公子復嗣根

鄭冲滎陽開封人常道鄉公時拜太保封壽光侯武帝即位進爵爲公薨諡成公子徽嗣簡

何曾陳國陽夏人少襲父夔爵武陽亭侯後封朗陵侯武帝即位進爵爲公薨諡孝子劭嗣

石苞渤海南皮人以破諸葛誕功封東光侯武帝即位封樂陵郡公薨諡武子統嗣

崇苞子統弟以伐吳功封安陽鄉侯後爲孫秀所殺羊祜泰山南城人魏世封鉅平子武帝即位以佐命功

進爵爲侯後鎮襄陽以功改封南城公薨諡成

篇

以祐

兄子

法興

孝武時封後以桓元黨誅國除

杜預京兆杜陵人襲祖畿爵豐樂亭侯從平蜀增邑以

滅吳功進爵當陽縣侯薨諡成子錫嗣

又

陳騫臨淮東陽人爲相國司馬封安國亭侯武帝即位

以佐命功封高平郡公薨諡武子與嗣

粹

浩之

以騫

元孫襲爵宋受禪國除

裴秀河東聞喜人以從討諸葛誕封魯陽鄉侯武帝即

位封鉅鹿郡公薨諡元子濬嗣

頴

濬少弟嗣賈后時輔政爲趙王倫所

殺

嵩

頴子

楷秀從弟與楊駿爲姻家駿誅坐不阿附封臨海侯
薨諡元子興嗣

衛瓘河東安邑人襲父勲爵閬鄉侯後以平蜀誅鍾鄧
功封菑陽侯武帝即位進封公惠帝時爲賈后所殺後

諡成

瓘

以孫襲爵

崇

張華范陽方城人以贊伐吳功封廣武縣侯惠帝時輔

政封壯武縣公賈后廢爲趙王倫所殺

王沈太原晉陽人高貴鄉公將攻文帝沈奔白帝以功

封安平侯武帝即位進爵爲公薨諡元子浚嗣

後爲石勒所殺

道素

太元初以從孫襲

崇之

宋受禪國除

荀覬潁川人以預討毋邱儉等功封亭侯武帝即位進

爵臨淮公薨諡康

徽

以從孫嗣

龍符

宋受禪國除

荀勗潁川潁陰人文帝爲晉王封安陽子武帝即位改

封濟北郡公薨諡成子輯嗣
峻

賈充平陽襄陵人少襲父逵陽里亭侯以預弑高貴鄉公封安陽鄉侯武帝受禪封魯郡公薨謚武謚韓壽子以外孫襲爵爲趙王倫所殺

模充從子以預誅楊駿功封平陽鄉侯薨謚成子遊嗣

郭彰太原人以賈后從舅封冠軍縣侯薨謚烈

楊駿弘農華陰人以后父封臨晉侯惠帝即位秉政爲賈后所殺

魏舒任城樊人武帝即位爲司徒封劇陽子薨諡康

融

庶孫

晃

李熹上黨銅鞮人武帝即位以佐命封祁侯薨諡成子

贊嗣

劉寔平原高唐人以參文帝相國事封循陽子元康初
進爵爲侯薨諡元子躋嗣

高光陳留圉城人以討成都王穎功封延陵縣公薨

王渾太原晉陽人襲父昶爵京陵侯以平吳功進爵爲

公薨諡元子濟嗣

王濬弘農湖人以平吳功封襄陽縣侯薨諡武子矩嗣
唐彬魯國鄒人與王濬共伐吳以功封上庸縣侯薨諡
襄

山濤河內懷人武帝即位以佐命功封新沓伯薨諡康
子該嗣

王戎渾子以預平吳功進安豐縣侯惠帝即位爲三公

薨諡元

愔子

以從弟
子嗣

鄭袤滎陽開封人魏常道鄉公立以定策功封安成鄉侯泰始間薨諡元子默嗣

李允遼東襄平人文帝時爲廣陸伯泰始初進爵爲侯薨諡成志

盧欽范陽涿人少襲父毓爵亭侯武帝即位爲大梁侯薨諡元子浮嗣

石鑒樂陵厭次人武帝即位封棠陽子後拜司空封昌安縣侯薨諡元子陋嗣

溫羨太原祁人以從駕討成都王穎功封大陵縣公薨
諡元

武陵沛國弘邑人景帝時爲大將軍引爲從事中郎後
封亭侯武帝即位封薛縣侯薨諡定子鋪嗣

任愷樂安博昌人尚魏明帝女晉國建封昌國縣侯薨
諡元子罕嗣

郭奕太原陽曲人武帝即位以東宮官封平陵男卒諡
穆

侯史光東萊掖人秦始初以侍中持節循風俗還稱旨
封臨海侯薨子元嗣 施

何攀蜀郡郫人以預誅楊駿功封西城侯薨子璋嗣

傅元北地泥陽人魏時以典農校尉稱職封鶉觚男武
帝即位進爵爲子薨後追封清泉侯子咸嗣 敷

祇咸從父弟以預誅楊駿功封靈川縣公薨

閻纘巴西安漢人爲西戎校尉有功封平樂鄉侯

謝鯤陳國陽夏人爲王敦長史以討杜弢功封咸亭侯

薨子尚嗣 康 肅 靈祐

曹志譙人魏陳思王植之子少襲封武帝受禪降爲鄆城縣公薨諡定

華譚廣陵人以討石冰黨功封都亭侯薨諡胡子茂嗣羅憲襄陽人爲蜀巴東太守蜀亡以郡降後卒追封西鄂侯諡烈

滕修南陽西鄂人爲吳廣州牧王師伐吳修帥衆赴難至巴邱而孫皓降乃與諸郡送印綬封武當侯卒諡聲

子並嗣 聲以討蘇峻功更封夏陽侯

馬隆東平平陸人以討羌平涼州功封奉高侯子咸嗣
胡奮安定臨涇人以從宣帝征伐功封夏陽子薨諡壯
陶璜丹陽秣陵人嘗爲吳交州刺史吳亡以地降封宛
陵侯

趙誘淮南人以討華軼杜弢等功封平阿縣侯後戰沒
諡敬

周玘義興陽羨人以討陳敏等定江南功封烏程侯薨

諡忠烈子勰嗣

札玘弟以討錢璿功封東遷縣侯後爲王敦所殺

懋札兄子爲晉陵太守封清流侯

贊懋弟大將軍從事中郎封武康縣侯

縉贊弟太子文學封都鄉侯

周訪汝南安成人以討賊功封尋陽縣侯薨諡壯子撫

嗣以功進封建城縣公 楚 瓊 虓

孟觀渤海東光人以受賈后旨殺楊駿封上谷郡公後

坐趙王倫黨誅

張輔南陽西鄂人爲吏以擊搏豪強政迹封宜昌亭侯後爲帳下督富整所殺

索靖燉煌人以討孫秀及破羌等功封安樂亭侯薨諡莊子聿嗣

綝靖子愍帝時輔政以禦劉曜功封上洛郡公後與帝俱降劉聰爲聰所殺

賈疋武威人愍帝時爲雍州刺史封酒泉公邀擊劉曜

大破之後爲羣胡所襲敗死

周浚汝南安城人以平吳功封成武侯薨子顗嗣

爲王敦所

殺閔琳

周馥浚從父弟以討陳敏功封永寧伯

荀晞河內山陽人以破汲桑石勒等功封東平郡侯進

爵爲公後爲石勒所殺

劉喬南陽人以預誅賈謐功封安衆男

劉琨中山魏昌人以斬石超迎大駕於長安封廣武侯

後爲段匹磾所殺諡愍子羣嗣

劉輿琨兄爲東海王越范陽王虓等所用有功封定襄侯薨諡貞子演嗣

邵續魏郡安陽人以敗石勒功封祝阿子後沒於石虎爲所殺

李矩平陽人以伐氐齊萬年功封東明亭侯

段匹磾東部鮮卑人父務勿塵遣兵助東海王越有功封遼西公匹磾襲父爵領幽州刺史爲石虎所攻敗沒

於虎被害

右西晉列侯姓名之見於史者按晉始分五等則侯之秩已不一又永熙初楊駿輔政普進封爵以求媚於衆議者以爲優於泰始革命之初及諸將平吳之功其後趙王倫既誅賈后遂竊帝位在職者皆封侯廝役亦加以爵位金銀冶鑄不給於印故有白版之侯君子恥之則其所濫及者蓋不可勝道矣

王導瑯琊臨沂人少襲祖覽爵即邱子元帝渡江導輔政歷受遺輔明成二帝爲相積封至始興郡公薨諡文

獻世子悅

早混悅弟
卒嗣

愜

恬導次子襲即邱子爵

協導子襲武岡侯爵

諡嗣協
爵

劉宏沛國相人以平張昌等功封新城郡公薨諡元

陶侃番陽人初以軍功封東鄉侯後以平蘇峻積功封

長沙郡公薨諡桓子夏嗣

宏綽之

延壽

宋受禪
降爲吳

昌侯

溫嶠太原祁人以討王敦功封建寧縣公及平蘇峻進

始安郡公薨諡忠武子放之嗣

式之

以弟嗣

郝鑒高平金鄉人以預討王敦功封高平侯後更封南

昌縣公薨諡文成子悛嗣

超

僧施

曇鑒子少賜爵東安縣伯

恢

曇子襲封

循

恢子

顧榮吳國吳人以討葛旗功封嘉興伯元帝鎮江東以

爲軍司卒帝即位追封爲公諡元子毗嗣

紀瞻丹陽秣陵人以討陳敏功封臨湘縣侯薨謚穆子

景

早友
景子

賀循會稽山陰人以討華軼功封鄉侯薨謚穆

薛兼丹陽人元帝即位以佐命功封安陽鄉侯

劉隗彭城人元帝即位以佐命功封都鄉侯後以王敦

反奔石勒

戴淵廣陵人以討賊功封秣陵侯王敦反淵拒之兵敗

爲敦所殺謚簡

應詹汝南南頓人以討賊功封觀陽縣侯薨諡烈子元嗣

甘卓丹陽人以討周馥杜弢等功封于湖侯王敦反卓討之敦襲殺卓諡敬

卞壺濟陰宛句人父粹齊王冏輔政時爲中書令封成陽公爲長沙王又所殺壺襲父爵成帝時輔政蘇峻反壺力戰死之諡忠貞子瞻

與壺同死 誕

瞻子嗣

敦壺從父弟以討杜弢功封安陵亭侯薨諡敬子滔

嗣

劉超瑯琊臨沂人元帝即位以佐命功封原鄉亭侯後
爲蘇峻所殺諡忠子訥嗣

孫惠吳國富陽人爲東海王越參軍以迎大駕功封臨
湘縣公

庾亮明穆皇后兄以討華軼功封都亭侯討錢鳳沈充
平之進封永昌縣公薨諡文康子羲嗣準

翼亮弟以討蘇峻功封廣饒男

冰亮弟以討蘇峻功封吳縣侯薨諡忠成

桓彝譙國龍亢人以討王敦功封萬寧縣男蘇峻之反

爲賊所害諡簡子雲嗣 序

冲彝子以從兄溫破姚萇有功封豐城公薨諡宣子

允嗣

王承太原晉陽人永寧初以豫迎大駕封藍田縣侯薨

子述嗣 坦之 愷

荀崧潁川臨潁人以預平王敦功封平樂伯薨諡敬子

黜嗣 籍

范汪雍州刺史晷孫以預計蘇峻功封都鄉侯薨諡穆
子康嗣

王舒丞相導之從弟以破蘇峻功封彭澤縣侯薨諡穆

子崑之嗣

陋之

宋受禪
國除

允之舒子以討蘇峻功封番禺縣侯薨諡忠子晞之

嗣 肇之

王廙導從弟以討杜弢等功封武陵縣侯薨諡康子頤

之嗣

虞潭會稽餘姚人以征討張昌等功賜爵都亭侯後進至武昌縣侯薨諡孝烈子伋嗣 嘯父

顧衆吳郡吳人以討蘇峻功封鄱陽縣伯薨諡靖子昌嗣

張闓丹陽人以討蘇峻功封宜陽伯子混嗣

陸晧吳郡吳人以平錢鳳功封江陵伯薨諡穆子湛嗣

阮晧弟以討蘇峻功封興平伯薨諡康子始嗣

何充廬江潯人以討蘇峻功封都鄉侯薨諡文弟子放

嗣松

褚裒太傅裒從父兄以拒蘇峻封長平縣伯薨諡穆子

希嗣

蔡謨陳留考城人以平蘇峻功封濟陽男薨諡文穆

諸葛恢瑯琊陽都人以討周馥封博陵亭侯討王含功

封建安伯薨諡敬子彪嗣

孔愉會稽山陰人以討華軼功封餘不亭侯薨諡貞子

閭嗣靜

沉愉從子蘇峻反以扈從功封永安伯薨諡簡子詒

嗣

陶回丹陽人以破韓晃功封康樂伯薨諡威子汪嗣

謝安陳國陽夏人孝武時輔政以禦苻堅功封建昌縣

公薨諡文靖更封廬陵郡公子瑤嗣該

琰安子以破苻堅功封望蔡公後爲賊所害諡忠肅

子混嗣

峻琰子封建昌縣侯子密嗣

元安兄子以征伐功封東興縣侯後以破苻堅功進

康樂縣公薨諡獻武子瑱嗣 靈運

石安弟以破苻堅時爲元帥封南康郡公薨諡襄子

注嗣 明慧 暕

王遜魏興人以征蠻功封襄中縣公薨諡壯子澄嗣

羊鑒泰山人以預誅蘇峻功封豐城縣侯

劉允東萊掖人以拒蘇峻功封豐城子後爲郭默所殺

子赤松嗣

桓宣譙國鉅人以前後戰功封竟陵縣男

伊宣族子以破苻堅功封永修縣侯薨諡烈子肅之

嗣陵

毛寶滎陽陽武人以破蘇峻功封州陵縣侯後守邾城

戰沒子穆之嗣

即虎生

以入洛功徙封建安侯珍

璩虎生子以討桓元功封歸鄉公子宏之嗣

劉遐廣平易陽人以討王含功封泉陵公薨子紹嗣

舉 遵之 伯齡

鄧岳陳郡人以討郭默功封宜城縣伯薨子遐嗣

朱序義陽人以討司馬勲功封襄平子後陷苻堅淮淝
捷歸國

虞預徵士喜之弟從平王含封平康縣侯

徐廣東莞姑幕人義熙初封樂成侯

袁瓌陳郡陽夏人以討蘇峻功封長合鄉侯薨諡恭子

喬嗣 方平 崧

耽瓌弟以平蘇峻功封秬歸男

劉牢之彭城人以破苻堅功封武岡縣男後謀拒桓元不克死元敗子敬宣嗣 光祖

劉毅彭城沛人以誅桓元反正功封南平郡公後爲劉裕所殺

諸葛長民瑯琊陽都人以誅桓元反正功封新淦縣公後爲劉裕所殺

何無忌東海郟人以討桓元反正功封安成郡公後討

盧循戰死諡忠肅子邕嗣

檀憑之高平人討桓元戰歿追封曲阿縣公

魏詠之任城人以贊討桓元功封江陵縣公

嵇紹康之子賈謚誅以不阿比凶族封弋陽子蕩陰之

戰死之贈進爵爲侯

翰從孫曠襲封

魯芝扶風郿人以討諸葛誕功封武進亭侯後進爵榮

城鄉侯薨諡貞

胡威淮南壽春人武帝時爲刺史以功封平春侯薨諡

烈子奕嗣

羊琇景獻皇后之從父弟封甘露亭侯薨諡威

王虔文明皇后之弟封安壽亭侯子士文嗣

愷虔弟封山東縣侯

楊文宗武元皇后父封務亭侯諡穆

羊元之惠皇后父封興晉侯

虞豫元敬皇后父早卒追封平山縣侯子允嗣 洪

褚裒康獻皇后父以平蘇峻功封都鄉亭侯薨諡元穆

子歆嗣

何準穆章皇后父封晉興縣侯

王蘊孝定武皇后父封建昌縣侯

王敦司徒導之從父兄以討華軼等功封漢安侯後舉兵反破石頭進爵武昌郡公病死討平蹠而斬之

桓溫彝子初襲爵萬寧男平蜀功封臨賀郡公北伐功

封南郡公子元嗣

僭位誅

祖約逖之弟以討王敦功封五等侯後謀反兵敗奔石

勒爲勒所誅

蘇峻長廣掖人以破沈充功封邵陵公後舉兵反伏誅

右東晉列侯姓名之見於史者



文獻通考卷二百七十一